

Date – 20/12/2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Chief Minister Pu Lalduhoma hoin nimin khan minister Pu B. Lalchhanzova enkawl department te hnathawh ennawna (Review Meeting) neih a ni.
2. PHE Minister Prof. Lalnilawma hoin PHE hotute chuan nimin khan, kan hmalawka krismas leh Kumthar huna Aizawl khawpuiin tui a mamawhna san belh tur lo phuhruk dan tur an sawi ho.
3. Mamit District Police chuan lirthei enfiah runpui, Mass Vehicle Checking Drive an huaihawt a, Mamit District chhunga Police Station leh Outpost zawng zawng ten lirthei an enfiah a ni.
4. Prime Minister Narendra Modi chuan nimin khan New Delhi-a Union Minister George Kurian chenna inah Krismas lawmna a hmanpui.

<><><>

### REVIEW MEETING

Chief Minister Pu Lalduhoma hoin nimin khan minister Pu B. Lalchhanzova enkawl department te hnathawh ennawna (Review Meeting) neih a ni.

Secretariat Conference Hall-ah hun hmanah hian Chief Minister chuan, Review Meeting chu thil dik lo zawng hrim hrime buatsaih an ni lo va, an harsatna leh an mamawh te, chak zawk leh tha zawka hna an thawh theih nana inrawnkhawmna te a ni zawk a ti a. Supply department leh Revenue department hnate chu a hautak a, an pawimawh si a, thawktute pawh inpe taka thawk turin an beisei a. Supply lam hian Ration card dik leh rintlak tak neih tum se la, sawrkar document pawimawh takah chantir an duh tih a sawi. Pu Lalduhoma chuan Review Meeting minute chu an bawhzui tha em tih an rawn ngaihven leh dawn tih sawiin, an thil sawi ho te tha taka bawhzui turin a chah bawk.

Food, Civil Supplies & Consumers Affairs department hnathawhte chu FCS&CA Director Pi Saizikpuii chuan a pho chhuak a. Ration Card var neiten a man to va buhfai an lei atangin sorkarin thla tin Rs. vaibelchhe 3 leh nuai 84 vel a hum thei niin an sawi.

LPG Home Delivery chu Serchhip khawpuiiah tha taka kalpui a ni tawh a, district capital dangah pawh bultan tawh an ni. Aizawl veng 29-ah kalpui tawh niin veng 53 dangah a then lai kalpui a ni a. LPG Distributors zawng zawngten kum thar

atangin veng pahnihah home delivery an kalpui belh leh vek ang. Zothan Indane chuan an operation area-ah home delivery hi an kalpui vek tawh thung bawk.

Buhfai dah khawl tha taka kalpui a nih avangin kuminah ruahtui tla tamin rei mah se buaina engmah a thleng lo va. Nakkum monsoon stock tur hi January thla atanga kalpui tan leh tur a ni.

Land Revenue & Settlement hnathawh pawh enpui niin, Mizoram pumpui hmun thuma thena hmun khat pawh survey a la ni lo a. Land Registration hi state dang te sum hnar lian tak a ni a, Mizoram sum hnar lian takah chantir tum ve mek a ni, an ti.

Kumin November ni 5 a Chief Minister-in a hawn tawh e-ram chu Common Service Centre atanga dawr theih tura tihfel thawkhat a ni tawh a. Kum thar atang chuan uar taka he application hi hma tum a nih thu a tarlang bawk.

(DIPR)

<><><>

PHE MINISTER

PHE Minister Prof. Lalnilawma hoin PHE hotute chuan nimin khan, kan hmalawka krismas leh Kumthar huna Aizawl khawpuuin tui a mamawhna san belh tur lo puhruk dan tur an sawi ho.

Sorkar thuchhuah tarlan danin kumin May thlaa Remal Cyclone tleh avangin Aizawl Greater Water Supply Phase I&III (37 MWD-SIPMIU) a chhia a. Phase -I chu November thla-ah khan siam that fel a ni tawh a. Tunah hian Phase- III hi siam mek a ni a, Phase -III atang hian nitin tui litre maktaduai 10 pump thin a ni. Chutiang a ni mek lai chuan November thla tawpah khan Greater Aizawl Water Supply Scheme Phase- II pumping line Chawnga Road, Khatlah siam a nih leh avangin tui pump Ni 2 chhung a khaih lak leh a ni. Ni hnih-khat tui pump a khaihlak hian tui sem hi kar khat vel a nghawng thin a, hei hi mipui lam hian hre thiam lovin, Electric Line a chhiat a, siam that ve leh Power Supply a pek leh nghal mai thei ang hian, sem chhonzawm leh nghal thei mai turin an beisei thin a, hei hi tui semah chuan a theih loh thu meeting-ah hian sawichhuah a ni.

December atangin Aizawl Water Supply Scheme Phase - I leh Phase- II chu tluangtakin pump theih a ni tawh a. Ni khatah tui liter maktaduai 28 pump chhuah char char a ni tawh a ni. Amaherawhchu tunah Aizawl khawpuia mipui nuia 3 leh sing 8 vel awm anga chhutin, ni khata mipui puhruk zualpui pe tur chuan tui hi liter maktaduai 36 vel zel pump a ngai.

Aizawl Water Supply Scheme Phase I leh Phase II atang chuan tui mamawh hi a pe seng lo tihna a ni. Hei bakah hian Aizawl khawpui chhungah Biak In 320 chuang a awm a, Krismas leh Kumthar chhung hian chawh rualin tui litre sing 3 mamawh ang an ni a. Hemi atana tui mamawh belh hi litre nuai 96 vel a ni.

PHE dept. in theitawp chhuahin AGWS Phase-III siam that hna a thawk mek a. Krismas hma chuan an siam zawh theih an beisei thu an sawi a. Lo siam tha hman loh pawh ni se, Krismas leh Kumthar huna Biak In a hman tur ang chu November thla atang khan Biak In Tuizemah tlem tlemin an lo dah khawl lawk tawh thu tarlan a ni.

<><><>

## LUNGLEI POLICE

Krismas leh Kumthar hunpui lo thleng tur denchhenin Lunglei Police te chuan Luanchhuah runpui neihin, Lunglei Police staff zawng zawng ten an remchan ang zela an thawkhawm pawisa tlingkhawm Rs 72569/- chu nimin khan Veng tin YMA Branch te nena an thlirho hnuah Lunglei khawchhunga mi chanhai zawkte tanpuina tur chu pekchhuahna hun an hmang a... An pawisa thawkhawm hi chhungkua 18 hnenah hlanna hun an hmang a, Police Officer leh an naute chu veng hrang hrang ah vak chhuakin tanpuina hi chhungkaw tin hnenah an hlan a ni.. hemi rual hian vawiin vek hian Buhfai bag 3 chu Bethel Center ah an hlan bawk a; a hma in Buhfai bag 5 in TNT Center, Lunglei chu an lo hlan fel tawh bawk.

(Desk)

<><><>

## ASSAM RIFLES

Assam Rifles te chu Siaha District chhunga Lakhi khua a khawtlang hruaitute nen an inkawm a, nimina inkhawmna hunah hian Village Council President leh khawtlang hruaitu pawimawh tak tak te an tel.

Inkhawm honaah hian Assam Rifles leh mipui ten thawhhona tha neih a pawimawh zia sawi lan a ni a, khawtlang hruaitu leh Assam Rifles te chuan mipui vantlang himna leh hmasawanna kawnga thawhhona tha tak a neih mek chu chhunzawm zel ni se an duh thu an sawi.

(PR)

<><><>

## FESTIVE SEASON POWER CONSUMPTION

Power & Electricity Department Engineer in Chief Pu H. Zonunsanga chuan Krismas leh Kumthar vuakvetah renchem leh fimkhur taka kawlpheha hmang turin mipuite a ngen.

P&E Engineer in Chief chuan Krismas leh Kumthar tuang tak leh tha taka mipuiten an hman theih nan department in theitawp an chhuah thu Akashvani a hrilh a. Mipuite chu fimkhur leh renchem taka eng hmang turin a chah.

## BYTE OF E-in-C H. ZONUNSANGA

P&E hotuten Akashvani an hrilh danin Krismas leh Kumthar vuakvetah Mizoramin kawlpheha a hman chu a sang thin a, hei hi mipuiten kawlpheha hmanga meilum an ai thin avang leh an menrei thin tlangpui bakah zan lamah programme hrang hrang huaihawt a tam thin vang te, kawthler leh mimal in hrang hrang te chei vang a nih thu an sawi a. Hengah hian kawlpheha renchem a pawimawh thu leh a kal tuang pangngai tibuai lo thei ang bera mipuiten theitawp an chhuah a pawimawh thu an sawi a ni.

P&E hotute chuan kawthler leh mimal in chei chu reilote atan a nih avangin kawlpheha hrui zam kualnaah a kal tuang pangngai khawih buai thin a nih thu an sawi a. Fimkhur taka tih loh chuan kangmei tichhuak thei thil hlauhawm tak a ni an ti a. Hei bakah hian ar vulh ngai lo, Krismas pual mahni in leh a vela ar vulh an awm

thin thu sawiin ar in leh vawk in atanga kangmei chhuak a awm thin thu an sawi bawk a.

(Corr)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnu dar 2 leh a chanve-ah Chanchinthar puan leh a ni ang.

(NSD)

<><><>

RAJ BHAVAN

Kum danga an lo tih thin tawh angin, kuminah pawh krismas leh kum thar vuak vetah Mizoram larsap chenna Raj Bhavan chu mipui tlawh theih tura hawn a ni dawn.

(Voice Cast)

*(Kum 2024 krismas leh kum 2025 kum thar pual hian kumin December ni 20 atanga ni 26 chhung hian hawn a ni ang a, nakkum January ni 2 leh ni 3-ah hawn a ni bawk ang a, heng niah te hian chawhma dar 10:00 atanga zan dar 7:30 thleng hawn thin tur a ni ang.)*

(Desk/PR)

<><><>

MAMIT MASS VEHICLE CHECKING DRIVE

Mamit District Police chuan December 18 leh 19 khan lirthei enfiah runpui, Mass Vehicle Checking Drive an huaihawt a, Mamit District chhunga Police Station leh Outpost zawng zawng ten lirthei an enfiah a ni.

Lirthei enfiah runpuiah hian a vaiin lirthei chi hrang hrang 463 check a ni a. Heng motor check zingah hian document fel lo leh dan zawh fakim lo 34 man an ni a, pawisa chawitir niin a vaiin cheng sing 3 chawi tir a ni.

Lirthei enfiah bakah ruihtheih thil - zu leh drugs mai bakah sorkar khap thil chi hrang - halpuah leh halmawi te pawh check tel nghal a ni a. Hunpui lo thleng tur chu Mamit District Police chuan mipuiten him leh zalen taka hmang turin duhsakna an hlan a. Mipuite chu sorkar dan tha taka zawm a, ruihhlo chi hrang hrang laka fihlim tur leh sorkar khap thil halpuah leh halmawi te hal lo turin an ngen a ni.

(RD Darthanzauva, Mamit PTC)

<><><>

## POTATO SEED FARM

NEC sum cheng nuai 198 senga hmalakna Development of Potato seed farm in Mizoram, Aeroponic System Potato seed. Agriculture Farm, Thingdawl ami chu nimin khan Agriculture Minister Pu PC Vanlalruata'n a hawng.

Development of Potato seed farm in Mizoram hi Alu chi siamchhuahna hmun tur niin, kum 2022 march thla atanga bul tan a ni a, he hmun atang hian Mizorama kuthnathawktu te mamawh aia tam mah Alu chi siamchhuah theih tura ruahman a ni. Hawna hunah hian khuallian Pu PC Vanlalruata chuan lo neitu ten an chhawr tangkai theih ngeina turin hmalakna chu hlawhtling ngei se a duh thu sawiin, Alu hi a chi tha kan hmuh theih thin loh avangin an hlawtlinpui thei lo thin a, tun tuma an hun hman chu Mizoram tan chinchhiahtlak a ni, a ti.

(Andrew Vanlalaiva, Koasib PTC)

<><><>

PM

Thla leh hian a vawi 8na atan Pariksha pe Charcha neih a ni dawn. He hun a Prime Minister Narendra Modi hnen a zawhduh zawh theihna registration hi hawn tan a ni tawh a, MyGov Portal-ah 14th January thleng hawn a ni ang. He program hian exam-a stress tihziaawmna tur leh zirlai, zirtirtu leh nu leh pate chu zalen taka nun hmang turin a fuih a ni.

Thuchhuah siamin Ministry of Education chuan pawl 6 atanga 12 zirlai te, zirtirtu te, leh nu leh pa te tan MCQ format-a quiz competition siam a nih thu a tarlang a, Registration kalpui chhung hian zirlaiten Prime Minister hnenah an duh ang zawhna an thehlu thei a ni. Zawhnate hi exam-a stress, career, hmalam hun atana duhthusam emaw chungchang a tlangpui hmachhawn dan tur a ni.

Prime Minister Narendra Modi chuan nimin khan New Delhi-a Union Minister George Kurian chenna inah Krismas lawmna a hmanpui. Pu Modi hian he hunah hian Kristian pawl hruaitu te a kawm bawk.

(News on air)

<><><>